

आकाशवाणी

खबरां जगमोहन शर्मा कोला

पैहले खास-खास खबरां:-

1. भारत ते संयुक्त अरब अमिरात नै पेट्रोलियम भंडार लम्मी अवधि तगर LPG आपूर्ति ते रक्षा सहयोग सरबंधि केंई महत्वपूर्ण समझौते पर दस्तखत कीते न।
2. प्रधानमंत्री नरेन्द्र मोदी होर 5 मुखें दे अपने दौरै दे दुए चरण च नीदरलैंड पुज्जी गेन। एमस्टर्डम ब्हाई अड्डे पर प्रधानमंत्री हुंदा सुआगत नीदरलैंड दे विदेशमंत्री टाम बेरेडंसन होरें कीता।
3. केन्द्री माध्यमिक शिक्षा बोर्ड नै 12मीं जमात दे विद्यार्थियें गी नतीजें घोषित होने दे बाद उपलब्ध स्हूलतें दा ब्यौरा दिंदे होई इक नोटिस जारी कीता ऐ जेहेद च इक निरपक्ख ते पारदर्शी मूल्यांकन प्रक्रिया लेई अपनी वचनबद्धता गी फही पक्का कीता गेआ ऐ।
4. अमरीका दे विदेश विभाग नै आखेआ कि इजरायल ते लेबनान वाशिंगटन च इक होर दौर दी गल्लबात दे बाद अपने संघर्ष विराम गी 45 दिनें लेई बधाने आस्तै राजी होई गे न।
5. बैंकाक च आयोजित थाईलैंड ओपन दे सेमीफाईनल च अज्ज भारत दे सात्विक साइराज रंकी रेड्डी ते चिराग शेटी ते मलेशिया दे नूर इज्जुद्दीन ते गोहस्ज़े फेई मर्दे दे डबल्स मकाबले च आमने सामने होगंन।

6. IPL क्रिकेट च जंदी रातीं लखनऊ सुपर जायंटस नै चेन्नेई सुपर किंगस गी 7 विकेटें कन्नै रहाई दिता। अज्ज कोलकाता दा मकाबला गुजरात कन्नै होग।

<><><><><><>

PM-UAE Visit

भारत ते संयुक्त अरब अमिरात नै पेट्रोलियम भंडार लम्मी अवधि तगर LPG आपूर्ति ते रक्षा सहयोग सरबंधि केंई महत्वपूर्ण समझौते पर दस्तख्त कीते न। एह समझौते पच्छम एशिया च जारी संघर्ष दे चलदे प्रधानमंत्री ते UAE दे राष्ट्रपति शेख मोहम्मद बिन जायद अल नाहयान हुंदे बश्कार अबू धामी च उच्ची सतह दी गल्लबात दे बाद कीते गे। UAE नै भारत च 5 अरब अमरीकी डालर दी रासपूजी करने दा वायदा कीता ऐ। इनें समझौते च Indian Strategic Petroleum Reserve Ltd ते आबूधाबी नैशनल ऑयल कम्पनी बश्कार भारत दी ऊर्जा सुरक्षा गी निग्गर करने लेई दस्तख्त कीते ते एदे च रणनीतिक सहयोग दा समझौता शामिल ऐ। विदेश मंत्रालय नै आखेआ ऐ कि इस समझौते कन्नै भारत दे रणनीतिक पेट्रोलियम भंडार च UAE दी हिस्सेदारी बधियै 3 करोड़ बैरल होई जाहग ते एदे कन्नै भारत च रणनीतिक गैस भंडार स्थापित कीते जागंन।

<><><><><><>

PM –Netherlands Arrival

प्रधानमंत्री नरेन्द्र मोदी होर 5 मुल्खे दे अपने दौरै दे दुए चरणे च नीदरलैंड पुज्जी गेन। इस दौरै दा मकसद यूरोपी मुल्खें कन्नै भारत दे रणनीतिक ते आर्थिक सरबंधें गी मजबूती देना ऐ। एमस्टर्डम ब्हाई अइडे पर प्रधानमंत्री हुंदा सोआगत नीदरलैंड दे विदेश मंत्री टाम बेरेंडसन होरें कीता। केंई भारतीय मूल दे लोकें उन्दा सोआगत-

भारतीय शास्त्रीय संगीत ते नाच कन्नै कीता। डच च सैनिकें बी उन्दा औपचारिक तौरा पर अभिनंदन कीता।



PM-Ease of Doing Business

प्रधानमंत्री नरेन्द्र मोदी होरें नागरिकें लेई कारोबार करने च सखाल ते जीवन गी आसान बनाने लेई सरकार दी वचनबद्धता गी फही पक्का कीता। सोशल मीडिया पर इक पोस्ट च मोदी होरें विदेश यात्रा पर Cess दे रुपै च बाददू कर जां Surcharge लाने बारे मीडिया च आई दी उस रिपोर्ट गी खारिज करी दिता ऐ। उ'नें आखेआ जे एह रिपोर्ट पूरी चाली झूठी ऐ ते एहदे च रती भर बी कोई सच्चाई नैई ऐ। प्रधानमंत्री होरें आखेया जे विदेश यात्रा पर इस चाली दी कोई रोक लाने दा कोई सोआल गै पैदा हुंदा ऐ।



CBSE-Class 12

केन्द्री माध्यमिक शिक्षा बोर्ड नै 12मीं जमात दे विद्यार्थियें गी नतीजें घोषित होने दे बाद उपलब्ध स्थूलतें दा ब्यौरा दिंदे होई इक नोटिस जारी कीता ऐ- जेहेद च इक निरपक्ख ते पारदर्शी मूल्यांकन प्रक्रिया लेई अपनी वचनबद्धता गी फही पक्का कीता गेआ ऐ। नोटिस मूजब जेहड़े विद्यार्थी अपने नतीजे थमां संतुष्ट न- ओह दंऊ चरणें आली समीक्षा प्रणाली दा इस्तेमाल करी सकदे न। पैहले चरण च विद्यार्थी अपनी मूल्यांकन कीती गेदी Answer कापियें दी स्कैन कीती गेदी कापियां हासल करने लेई ऑनलाईन आवेदन करी सकदे न- जिनें'गी समीक्षा लेई डायनलोड कीता जाई सकदा

ऐ। CBSE नै आखेआ ऐ जे स्कैन कीती गेदी कापियें लेई दरखास्तां इस म्हीने दी 19 तरीक थमां लेइयै 22 तरीक तगर हर विशे लेई 700 रपे दी फीस पर ऑनलाईन जमा करोआई जाई सकदियां न।



Israele –Lebanon

अमरीका दे विदेश विभाग नै आखेआ कि इजरायल ते लेबनान वाशिंगटन च इक होर दौर दी गल्लबात दे बाद अपने संघर्ष विराम गी 45 दिनें लेई बधाने आस्तै राजी होई गे न। विदेश विभाग दे प्रवक्ता Tommy Pigott होरें आखेआ जे एह फैसला 2 दिनें दी सार्थक गल्लबात मगरा आया ऐ ते एहदे बाद अगगे दी गल्लबात हून 2-3 जून गी होग। सोशल मीडिया पोस्ट च Pigott होरें आखेआ जे उनें'गी मेद ऐ जे इनें विचार-विमर्श कन्ने दौनें मुखे बशकार स्थाई शांति- इक दुए दी संप्रभुता ते इलाकाई अखंडता गी पूरी मान्यता थहोग ते उन्दी सांझी सीमा पर सेही मायने च सुरक्षा कायम करने च मदाद होग।



Badminton

ते हून बैडमिंटन।

बैंकाक च आयोजित थाईलैंड ओपन दे सेमीफाइनल च अज्ज भारत दे सात्विक साइराज रंकी रेड्डी ते चिराग शेट्टी ते मलेशिया दे नूर इज्जुद्दीन ते गोहस्ज़े फेई मर्दे दे डबल्स मकाबले च आमने सामने होगंन। एहदे शा पैहले भारती जोड़ी नै कल क्वार्टर फाइनल मकाबले च जपानी जोड़ी नोमुरा ताकुमी ते युइची शिमोगामी गी 21-12/ 21-

13 कन्नै रहाया। तौआई पी.वी ते लक्ष सेन समेत होर भारतीय बैडमिंटन खडारी
टूर्नामेंट सवा बाहर होई गेन।



IPL

IPL क्रिकेट च जंदी रातीं लखनऊ सुपर जायंटस नै चेन्नेई सुपर किंगस गी 7 विकटें
कन्नै रहाई दिता। अज्ज कोलकाता दा मकाबला गुजरात कन्नै होग।

188 रन्ज दे लक्ष्य दा पिच्छा करदे होई लखनऊ सुपर जायंटस नै 17में ओवर च गै
मैच अपने नां करी लैता। 38 गेंदे च 90 रन्ज बनाने लेई मिचेश मार्श गी प्लेयर ऑफ
द मैच चुनेया गया। पैहले बल्लेबाजी करदे होई चेन्नेई सुपर किंगस नै 20एं ओवरें च
5 विकटें दे नुकसान पर 187 रन्ज बनाए हे। कार्तिक शर्मा नै 71 रन्ज दा योगदान
दिता ते लखनऊ सुपर जायंटस लेई आकाश महाराज सिंह नै 3 विकटां हासल
कीतियां। इस जित दे बावजूद बी लखनऊ दी टीम अंक तालिका च सब्भनें शा हेठ ऐ
ते प्ले ऑफ दी ट्रौड शा बाहर होई चुकी दी ऐ। दुई बक्खी चेन्नेई सुपर किंगस 6मीं
थाहरै पर बनी दी ऐ। IPL च अज्ज इक गै मैच खेडेया जाहग। एह मैच संजा साड्डे 7
बजे कोलकाता दे ईंडन गार्डनस च कोलकाता नाइट राइडर्स ते गुजरात टाइटन्स बश्कार
खेडेया जाहग।



Textiles Export

जम्मू-कश्मीर दी पारम्परिक समर्थ गी भारत दे महत्वकांक्षी कपड़ा निर्यात आले नजरिये मूजब बनाने दी दिशा च इक बड्डी पैहलकदमी दे तैहत प्रदेश दे दस्तकारिए ते हत्थखड्डी मैहकमे नै भारत सरकार दे कपड़ा मंत्रालय दे सैहयोग कन्ने श्रीनगर दे SKICC च दंऊ दिने दी इक बड्डी कार्जशाला दा आयोजन कीता गेआ ऐ जेहदा विशे ऐ- “वैश्विक बजारें लेई कपड़ा: 2030 तगर 100 बिलियन डालरें दे निर्यात दे लक्ष्य हासल करने लेई रणनीति”। इस कार्यक्रम नै नीतियां बनाने आलें- निर्यात करने आले- उद्योगपतिये-कारीगरे उद्यमिये- निर्यात गी बढ़ावा देने आली काउंसलें ते होरने सरबंधत धड़े गी इक सांझे मंच पर आनने दा मौका दिता ऐ। उद्योग ते बपार मैहकमे दे कमीशनर सैक्रेटरी होरे आलमी सतह दे कपड़ा बजारें च जम्मू-कश्मीर दी मजूदगी बधाने बारे व्यापक गल्लबात कीती।



Intl. Light Day

अज्ज अंतराष्ट्रीय “प्रकाश” दिवस मनाया जा रदा ऐ। रोशनी दे ध्याड़े दे रूपे च मनाए जाना आहला एह दिन हर बरे 16 मई गी भौतिक वैज्ञानिक ते इंजीनियर थियोडोर मैमन हुंदे आसेया 1960 च लेजर दे पैहले कामयाब संचालन दे चेतें च मनाया जंदा ऐ। इस बरे इस ध्याड़े दा विषय सार ऐ- “इक टिकाऊ भविक्ख लेई रोशनी” जेहड़ा इस गल्लें पर केन्द्रित ऐ कि रोशनी पर आधारित टेक्नॉलोजियां ऊर्जा कौशल प्रकाश बवस्था हरित विनिर्माण ते बेहतर राई-बाई विधिये राएं स्थिरता च कियां योगदान देई सकदे न।



National Dangu Day

अज्ज “अंतराश्ट्रीय डेंगू” दिवस मनाया जा’रदा ऐ। सेहत ते परोआर कल्याण मंत्रालय आसेया अधिकारिक तौर पर घोषत इस ध्याड़े गी मनाने दा उद्देश्य डेंगू बारे लोकें च जागरूकता पैदा करना ते मानसून शुरु होने कोला पैहले-पैहले एहदे कोला बचा सरबंधि उपाएं गी मजबूती देना ऐ। इस ध्याड़े गी मच्छरे दे अंडे देने गी रोकने सरबंधि उपाएं बारे लोकें गी प्रेरित करने लेई मनाया जंदा ऐ- तां जे लोक अपने आहले-दोआले ऐसे सारे जरिएं गी हटाई देन- जित्थै मच्छर अंडे देई सकदे न- जियां जे खाली पेदे धड़े-भांडे- टैरें वगैरा गी जित्थै बरखा पौने पर पानी किट्ठा होई सकदा ऐ ते मच्छर उस खड़ोते दे पानी च अंडे दिंदे न।

